

四庫全書

集部

欽定四庫全書

草堂雅集卷五

元 顧瑛 編

張雨

字伯雨錢塘人博覽羣書故其詩清曠俊逸時輩
不能及始隱茅山後徙杭之靈石澗與趙魏公虞
翰林友善詩名震京師自號句曲外史云

玉笙謠

我有紫霞想愛聞白玉笙縣貌比竹無靈氣昆丘採此
十二莖鳳咮銜明珠鳳翼排素翎金華周郎妙宮徵子
晉仙人初教成月下吹參差羣雛亦和鳴緱氏山頭白
雲起七月七日來相迎長謝時人一揮手飄下滿空鸞
鶴聲

題理妝士女

誰見新妝出綉幃辛夷花下六銖衣莫教蜂蝶知蹤跡
閒與鄰娃鬪草歸

燈花聯句

有序

永嘉李季和自金陵持趙涼公書來屢宿茵閣
下十月三日夜天始霜殊寒雨燈並作花遂聯句
於酒間

星閣迎寒閤霜鐘動夜捩

孝光

酒深燭灺火漏下續蘭

釭寸草熒芝小

雨

丹葩瑞帶雙金枝交婉孌

孝光

銀粟

亂鬢鬟螭結飛蛾笑

雨

膏融吐鳳慢承珠光透鏡

孝光

火齊幻垂幢的的輝青瑣

雨

淫淫甃玉釭燭龍擎紫蓋

孝光 翹燕綴紅躡隣眼書窺隙雨 仙眉墨暈窓狂吟心

蕊發喜聽足音足 孝光 折聖風吹座鉤簾月墮江雨青

藜如見遇揮手出紛囒 孝光

延陵公承慶堂詩

大江蒼方兀龍虎輔元之家百神賴望拜受釐若稽古
上清真人閤衆甫新宮潔齋導天語紛雲郁霞錯承宇
虛皇穆然陽衛武左欵右飈降軫羽縣鐘鏜鏜迅擊鼓
赫金祭服赭朱戶雙珠月明帶寶璐挾以流黃玉櫪具

既竣大禮私事舉吉日宗族奉爵俎青紫系地簪綬組
魏張帶劍新捧土饒國開觀治宿莽報君親師物咸覩
撫已一念或未溥西壁孝書元範府寒氷層陰發春煦
日幽若明沐仁雨道德大非方仙伍月佩六印非適取
持旌趨名迹旁午下土滓塩寧久處天闕會規足蹈矩
願天願地多泰稔畢志萬年奉明主小史作詩孰敢侮
吁嗟厚德耆之祖

集太白語酌僧淨月

主人碧岩裏為予話幽栖真訣自從茅氏得風流還與
遠公齊滿堂空翠如何掃而君解來一何好白玉塵尾
重談玄琉璃硯水常枯槁蒼蒼雲松拂彼白石世人聞
此皆掉頭就中與君心莫逆袖拂紫烟去空中聞天雞
借問蘇耽鶴早晚向江西

鐵崖先生跋曰予觀貞居子集句詩政如冶城
銅象捧額珠蓮座於長干也可寶可玩太白見
之當曰吾錦千萬機衣被天下詩人烏得割截

如此貞居子其慎取之哉勿俾責償也會稽楊
維楨跋

棹歌

暇日拏舟出郭門觀風聊采野人言借車踏水半陂麥
打鼓賣魚何處村光陰轉比中年促生聚唯餘西澗繁
政使枋榆安斥鷃又從倦鳥返丘園

強行之常州教授

聞道詩書種南方有此強才名文學掾步武紫薇郎家

與準比近槃餘苜蓿長諸生時列坐亦足奉華觴

道園先生詩送張元朴還龍虎山有云塵尾每懷張

外史鷺犀今屬薛元卿元朴索次韻

想見先生戴笠行黃茅岡上看陰晴承聞祖道同疏傳
鄙說還鄉似長卿海內好詩元自少江西行李不嫌輕
謫仙愛與元丹語烟子而今亦有名

雪圖絕句

貌得玉維三尺圖姑山無此雪肌膚瓊臺玉樹參差是

祇欠芭蕉一兩株

玄覽堂絕句

簾櫳低亞小梅枝
快雪時晴綠滿池
鈴索不搖鸚鵡睡
客來假寐亦多時

次韻段推官觀潮

雪濤捲入白螺盃
雲夢吞將滌瀨堆
陣馬直從天漢落
颶風先自海門來
青山一面開銀壁
黃纈中央立露臺
如在畫圖留壯觀
江頭白首不堪回

鐵崖新居曰書畫船亭作詩以寄

蘇州去訪揚雄宅近水樓居似月波東府官曹知者少
西山爽氣望中多臺招天上仙人鳳池養山陰道士鵞
誰和涼風吹鐵笛莫愁艇子柳枝歌

玉山詩曰錦衣坊口揚雄宅飲馬

闕

水波

風信東來春事早湖光西去夕陽多館娃隔水
啼鶯燕弟子填門列鳳鸞無那老狂狂更甚劍
蕭猶倚小紅歌

和虎丘寺壁東坡韻

日出東海頭虎氣踞茲嶺渴心我生塵邂逅輓轡井寧
若將軍拜奔泉酌老耿莽丘專鬼物陰壑雜蛇黽歐冶
千金鑄百鍊豈重礦似聞神物化後日屬吳猛怪蟒既
血刃大道就爭騁我行試勃窣鵬杖先祝哽小吳不滿
眼坐納三萬頃風高塔鈴語石迹羅衣冷松水翰歸吳
愚溪柳遷永吾非若人徒短句惜流景茶煙寄禪榻弄
我鬢絲影散人號江湖奚必煩上請

題春溪晚渡

怪底朝來雲氣升，雨痕洗遍碧崢嶸。
山腰行李去未遠，谷口人家呼即應。
彷彿簫臺凌鳳吹，安排春水理魚罾。
卧遊已愜平生志，深負牀頭六尺藤。

題沉香山圖

珊瑚鐵網枝柯爛，沉水假山煙霧濛。
甲煎相和作庭燎，奢淫龜鑑畫圖中。

題王若水梨花山鵲

山雀語查查驚飛白雪花清明人載酒寒食客思家

題大癡畫山水

獨得荆關法金壺墨未多異時傳畫譜誰識病頭陀

雲林席間懷鐵笛簡草堂

花朝無花也可憐桃李矜持不作妍懶聽雨聲眠白晝
夢乘艇子上青天閒居尚肆浮雲志老病難趨卜夜筵
絳帳先生唯寂寞後堂自理琵琶絃

題漁父圖

我本玄真老孫子從事綸鈎相娛嬉浮玉山前一瓢酒
頗恨時無顏太師

題李遵道竹

閒步風篁嶺上來蕭然衣袂上莓苔只因悞向東樓醉
又為黃岩夢一回

題李遵道古木圖

毫染墨池風露足絕憐長釣拂珊瑚靈和殿前好垂柳
肯來相伴檣株拘

題簷蔔花錦鷄圖

六出花繁幽塢靜
雄雌聊戲竹間雲
楚人重價山鷄得
只為胷中錦繡文

題商德符秋山圖

雲磬蒼崖瞰草亭
飛雲如雪照岩扃
素琴不是便山水
要舞胎仙獨自聽

題許飛瓊圖

寫韻彩鸞騎虎去
吹簫弄玉跨鸞歸
昭華玉琯青天上

好在飛瓊獨自飛

題吳彩鸞圖

小點紅鸞寫四聲於菟何事載娉婷不如相伴騰空子
來往匡山九折屏

錢塘醉歸

湖上鴉啼暮雨微歸鞭忙趁落花飛若教禿鬢翁能飲
肯羨山人倒載歸

題碧筒酒

采綠誰持作羽觴竹林人共晚樽涼玉莖沁露心微苦
翠蓋承雲手亦香飲水龜藏蓮葉捲吸川鯨恨藕絲長
傾杯誤展淋浪袖笑絕耶溪窈窕娘

山中

一枝石瘦如麟角六出花開似麝臍隨意莓苔一杯酒
也勝騎馬聽朝雞

鶴塚

鶴壽千年定有無羽衣全脫雪模糊樵人為裹玄黃幣

少保親傳粉墨圖尺土未乾春草短三山何在白雲孤
夜寒蕙帳應岑寂別向華亭覓鳳雛

三香圖

秋水為神玉為骨山礬是弟梅是兄國香零落王孫遠
依舊江南春草生

梅竹雙清圖

竹外一枝斜更好自有此詩無此畫承平公子翰墨林
寫影圖香戲春夜分明敲弄明月珠賈胡不識千金價

達秘書詩曰冰魂無夢到瑤階翠袖雲鬟並玉釵青鳥莫銜紅綬帶夜深重認合歡鞋

題岳家舊藏高尚書雲山圖

猶是相臺故物如許雲山有情老我慧因澗上猶夢尚書履聲

題顧定之竹

毘陵參軍顧定之為予醉掃風竹枝參軍久留坐深夜要看官奴秉燭時

題文與可竹

伯仲唐人蕭協律政爾奴隸王黃華三百年間一枝玉
石室往矣令人嗟

用韻送淨月上人

陰崖顛風無時興篁竹偃地虎晝行層冰積雪卧空谷
春至唯聞禽鳥鳴華陽南便洞窻小香烟西放峨眉道
神僧問訊破孤寂把臂入林一傾倒帕頭蒙寒驢背馱
泥滑穩於杯渡波寄謝少年王微和獨行其如法汰何

題倪元鎮畫

為覓高人梁伯鸞遺墟井臼已凋殘天寒日暮一瓢酒
采藥行蹤卷裏看

題張溪雲畫釣勒竹

為愛風篁手自摹不煩把燭倩官奴須當白戰簫笛谷
羞殺江南沒骨圖

和倪元鎮寄鄭有道

失喜聞遷水竹居一篷烟雨正愁予便思袂被熏金鴨

金匱要略卷五
要看臨池洗玉蜍絳帳後堂聞女樂青帘畫舫載圖書
虎頭食肉還公等苜蓿晨飧自有餘

天池石壁

嘗讀枕中記華山閼中吳神泉發其巔青壁繚其隅春
風四山來羣綠互紛扶羽觴曲折行浮花與之俱採芝
搴薜荔洗玉弄芙蓉聲更頗好名石窪作漁湖鴻乙志
草堂掃烟遂成圖而此滌煩磯閱世如擣菰發興雲林
子盥手與我茅居然縮地法挈入壺公壺

贈別休休菴了堂上人

老僧廿年不出戶
袈裟搭架風披披
祖衣留在阿蘭若
佛法傳過高句麗
客牀雪鍊一甌茗
經藏苔昏三尺碑
不向鄰房看偃蓋
卷中原有古松枝

和東坡書蔡端明詩二放營妓詩三虞伯生所題
詩四凡九首

日將公事湖中了
醉入重城列炬明
自古大藩財賦地
古人偏得賦閒情

謝女嬌吟雪比鹽北臺鳥耳見雙尖衲衣正索歌姬笑
不道春寒繡被添

寫韻軒中塵不驚與誰同躡鳳凰翎彩鸞可惜情緣重
只合清齋寫道經

釵頭新綠荔枝紅却與江桃色味同聞道端明新進譜
一時殿閣起薰風

香辟春寒玉辟塵流蘇斗帳醉和春一雙明月都無價
寂寞人間第一人

江南春盡水如天
浪迹先生不上船
近就闌間城下宿
可憐霜月夜娟娟

青城樵者一衰翁
寫罷烏絲滿袖風
消得玉堂金斫匣
至今傳入畫圖中

雪煮龍團怯醉魂
分茶故事與誰論
纖纖玉腕親曾見
只有春衫舊酒痕

白公種竹蘇公柳
談笑功名後世誇
依舊封雲三萬丈
斷橋誰與築堤沙

乙酉元日試郭杞墨書三韻

山寒靜雞犬爆竹動比隣倦踏街頭鼓稍還林下人前
身病居士猶不失冠巾

澗北梅樹陰於屋垂陽景罕曜歲三月始華以五
言導其生意

陰澗殘梅枿臨流一向歌但存孤注在敢恨一生遲凍
雨如相照春寒不受吹後時翻見獨宰物遂成私

咏綠萼梅華

山中古仙子無言春寂寥玉容淡朝雨翠氣濕微霄凌
風快玩影弄雪妬攀條解覓何郎句還憑舞袖招

題黃子久畫

中峰大面削鐵如巖岫綺錯非一途上連閣道旁屋廬
尋窓數戶愁崎嶇米顛所製三尺圖筆力視此微粗疎
閨風之臺遲子久不歸正為松江鱸

答楊廉夫見寄

弄水摘花春可憐風雨倦尋茆步船我家南塢有靈石

龍井西頭無杜鵑野鶴扶雛畏人過弱柳委地趁蠶眠
子雲胡為甘寂寞後世何人知太玄

摘阮圖四言

長松結陰芳草如莽立中微吟有天際想彼玩者誰阮
生撫掌一鳥不鳴衆山俱響

汪復心遣姪彥維自歙求詩

汪倫自愛桃花水張翰祇思蓴菜湖九十山翁莫相惱
題詩元沒得工夫

寄韓介石并送白蓮

丈八荷滿喬木材藥珠偏向夜明臺絳綃龍君服日去
碧眼侍郎騎雨來天水染雲如淨練落花殄玉似空杯
韓家弟子多才思乞與香奩相對開

茅山新居十絕

崇玄館主在齊梁廼有元之吳郡張相望八百四十載

我歸鶴臺如故鄉

事見茅君
九錫碑

望見飛簷松杪花下盤陰洞石聲牙老樵迷路驚相問

若箇江東道士家

風水所言惟理氣眼明此術未全疎景純解道游仙句

信是青囊有異書

近受草廬吳先生郭璞書

肯借山中步障錦與作天下庇寒裘三尺窓櫺萬株木
那怕霜寒到上頭

縹緲洞庭連白雲綠橘黃柑能見分昨日扁舟尋好事
明年處士比封君

谷中僅有一庵住壇上唯餘數石陳杖隨流水過鄰舍

席與長松分主賓

已拜茅君為座主從稱外史作官衙道家六經發願寫
深向石頭藏一函

屋壁置書碑板多雄虹光怪鳳皇阿看盡空山十日雪

竈突無烟奈爾何

鳳凰阿玄
洲地名

只有天公終可倚我作巢居名倚天未必高居無事業
終日讀書兼打眠

龍虎山中薛元子瓊林築臺詩亦工應接箇山聊爾爾

非關千里事同風

題畫屏

一幅面屏秋月圓
荻花楓葉滿江天
江州自是無司馬
多少琵琶過別船

答楊廉夫

黃篋樓中唯飲酒
樓下長溝鳬雁多
灣頭橋斷迷青草
湖面風來生白波
饒奴競煮脫裯笋
老魚戲啜如錢荷
詔書寬大到海角
河北饑氓爭倒戈

題子固墨寫水蕉

因依水石間，小蕉露如洗。
聊以觀我身，浮脆政如此。
平原佳公子，泚筆寫蘭芷。
君看數寸碧，氣壓凡花卉。

贈漁樵侶

郁闕坑前負薪者，道士磯頭垂釣翁。
我輩與結平生友，夫君還有古人風。
水羞涼味蒲芽白，野飯晝香松菌紅。
借問行藏多歲月，不離三泖九山中。

悼薛外史

元卿難再得本是餐霞人高懷獨超物洞鑒亦絕倫君
自江東我吳下早歲聯翩待金馬御榻賜書凡一柬仙
苑偷桃動盈把紫虛元君之玉訣青城先生教我者感
君多道氣探懷為君寫學士承旨平原公許我與君楊
許同一時標名兩外史玉樹蒹葭立下風我還句曲餘
廿載君乘輶軒歷四海歸景橋西結草樓樓中襖被長
相待風烟山水共追尋福臨洞口話離心年深書字化
為碧白首蒼茫成古今聖井山崩數千尺君從羣龍去

無迹困頓鹽車篠嶺頭此日思君復何益

題趙善長小景

杳靄仙雲小鳳池朝來翰墨有光輝
湘湖為愛屏風疊夢趁秋湖夜夜歸

懷茅山

我有草堂南洞門常時行坐虎同羣
丹光出林掩明月玉氣上天為白雲
閒憶田泉洗蒼术更思陶澗采香芹
歸來掩戶應高卧莫遣為人書練裙

道言

造物於我厚一切使我薄鉗中有儲粟持此卧雲壑
敝廬能苟完得味在藜藿花鳥與予友尊酒不獨酌
牀頭堆故書敗履置牀脚未嘗身沒溺何與世濁
惡政如敗牛馬不識羈與絡異時老髡髽會有南面樂

奔月卮歌答鐵崖所作

甓社明珠奔入月脫殼政似風蟬潔漁網出之不敢視
滌盡含沙光不減文昌四星吞在腹一一金晶大如菽

蜃物還來作飲器
日夜雄虹亘茅屋
一扇桃核寬有餘
半葉蕉心卷未舒
飲非其人躍入水
怪雨淒風生坐隅
置之天上白玉盤
斗柄挹酒長闌干
李白跳下鯨魚背
持勸我飲相交懽
幽宮馮夷為予泣
酌盡海水百怪出
還我平生老蚌胎
許君醉卧鮫人室

衛青玉印

公主家奴尚公主
刺玉姓名奚足多
為問任安門下客
大將軍去更如何

王時敏聽雪齋

頑寒鼎鑪河流漸銀濤鐵騎交奔馳玲瓏浙簌尾溝滿
坐窓已有幽人知東家暖客紅醅凝嘈雜新聲迷聽瑩
後園壓折萬琅玕雪多政自無人聽我時空山夜寂寥
風簷雪竇篩瑤瑤希聲䟽越不可盡鳴球戛擊如聞韶
憶昔齋宮困學翁大書聽雪煩楚龔百年勝事將毋同
不傳師曠傳王恭鶴氅明朝行雪裏須辨龍頭煎雪水
牀下何人聞闐蟻喚起春雷來洗耳

鮮于太常聽雪齋龔聖予大篆題榜皆陳迹矣
篇中借以發端云

贈鄭明德

五季雖無人獨行唯鄭張與子載同世而我匪異鄉薦
明吾弗如子則雲叟強嘉子行秘書以腹為笥箱操觚
仍尚左立辭多惡方吳兒命乞錢掉臂輒相將智如泥
中龜處污深蓋藏烟庖縣大哉蠹屋排積倉兩兒稍卷
婁一老足彷徨適經吳市門要我羅酒漿聯句吟吻健

敵棋貪計忙刪詩借河潤作序分壁光寒林踰正色國
艷終媚香狷者有不取聖固念作狂願子勗明德豈惟
家之慶異時同傳好咄哉無歐陽

伯雨至正十年秋歿於錢塘開元宮英南山靈
石塢予偕楊廉夫袁子英祭奠下復得其詩用
刊於左

彭南陽真人雲窩煉丹之所

石枰餘子皆生路洞室藏書盡隱文誰與解醒千日酒

我來分住一窩雲虎龍金碧親承訣鸞鵠青冥動作羣
莫向爐中參火候定知此事屬彭君

送鄭明德過越

四十日春廿日雨問花尋柳意茫然竹根卧鉗高筆塚
竈下生薪連朮烟茅家名餘鐵鑪步龍井氣宵金沙泉
稽山酒船速回棹遲子歸來烹麋拳

吳宗師岳宮行香次韻

元日朝元回羽隊東華門外踏春陽還趨岱岳祠宮闕

遙識仙官劍珮香國有著龜金作鑑年登耆艾鬢如霜
老人星在薇垣內可是人間化日長

贈納琳大監

論卷聚書三十萬錦江江上數連艘追還教授文翁學
重歎徵求使者勞石室談經修俎豆草堂迎詔樹旗旄
也知後世揚雄在獻賦為郎愧爾曹

請以蜀文翁之石室揚雄之墨池杜甫之草堂皆
列學宮又為甫得謚曰文貞以私財作三書院偏

行東南收書三十萬卷及鑄禮器以歸虞奎章記
其事邀予賦詩如上

次韻答薩天錫見寄

推敲指點據銀鞍苦為搜詩夢不安誰會鳳凰臺上意
手接黃菊看鍾山

秋日晚興

暝色入林烟火微暮雨欲來如有期野雀喧爭棟樹子
幽人行把菊花枝山空始見水泉涸寒至乃索衣裘遲

莫謾題詩將寄遠不多故舊在京師

巢雲樓

初陽臺上白雲多雲裏層層玉樹柯
栖息一枝元自穩飛翔千仞奈渠何
雨中幕燕雷驚去峰頂鸞笙月送過
好在丹梯無百尺屋頭展盡白鷗波

閬州瓢

閬州瓢是仙家具壺嶺仙人遠寄將
凍芋抽萌元自短鳳笙排管未成行
瓠尊甚大浮江海斗柄空長挹酒漿

樹響風聲非外物許由何事不相忘

泗州磬

玉聲試叩極清圓琢就魚形也可憐前日泗濱求樂石
異時堂上奏宮懸師襄入海誰從問荷蕢行歌老更顛
法駕前頭親導引鳳鸞音節若為傳

松化石

鐵面那知是木腸髮毛無復舊蒼蒼鍊形千載徂徠上
洗髓三生琥珀香大節堅完餘鶴骨長虹光怪奪砂牀

白羊卧護金華洞不屬牛家甲乙藏

次趙伯常運使留題礪阿

莫笑坳堂水膠盃泉頭落木動成堆天寒政使蛟龍卧
日短何煩駟馬來杖策東坡靈石塢留題外史讀書臺
舉觴賓客風流甚老子游山第一回

危太樸以史事南來搜書風雨宿南礪明日追寄
布衣走下雲林顛檢閱經書天子筵去家昔踰半萬里
別我經今十九年輜軒使者采圖籍龍門太史行山川

礪阿一宿慰風雨起視留墨心茫然

寄劉伯溫大監

臺閣如公最有稱
輶車騄馬數能乘
校書在昔專劉向
秘監於今復魏徵
汗簡削成金作匱
泰階平處玉為繩
信有山人唯寂寞
側身長倚白雲層

次韻黃伯成見寄

金錯松林黃葉樹
三叉路口問吾廬
青山對話惟捫蝨
落日催歸獨跨驢
土木形骸嵇叔夜
波瀾文字木玄虛

殘年書札相存問莫道天寒無鯉魚

剪韭亭

剪韭亭下看春雨剪韭雨肥含土膏不緣纖手青絲菜
獨愛美人金錯刀隱居拔薤那能數於陵灌園徒爾勞
明朝韭長復須剪眼中荼蓼若為薈

惠山贈孟宗鎮

惠山西磻多喬木望見茅堂在水濱鄒嶧世家猶閔閔
春申祠宇是比鄰深林暝色林敷暖微雪朝光戶牖新

不為茶經求陸子端從蓮社拜遺民

次韻虞公和斷江和尚松詩

松下微吟怯病棕
支離潦倒似支公
頂因巢鶴翻成結
心為依禪畢竟空
陸子壇前春古澹
葛翁井上雨青蔥
茯苓乞與楊員外
誰與緘詩過浙東

和虞公韻

耿耿千柱壓城西
志肅祠官倏忽歸
暮把瓊芳迎太乙
朝陪羽仗謁凝暉
白雲青嶂天機熟
老樹顛崖目力微

勅賜樽桑朝日暈天光傾向紫金衣

和僧游西山

我愛飛來與靈鷲古洞嵌空爭穴穿壞衲深依蕭寺住
老猿寒抱白雲眠百年山中皆樂土二月江南唯雨天
遲晴一過繡經室肯為挈壺從幻仙

寄楊廉夫

褚君登善為隣曲司馬天台是我師閉閣時須薰篤耨
清齋還許食伊尼五湖烟水舟無恙一月春寒柳未知

生世不逢賢者識從來誰問五羊皮

寄楊廉夫鄭明德

快雪時晴春意動歸舟移纜向芳塘走尋飲伴雞豚社
悞落詩名錦繡坊子雲奇字誰能問鄭老襟期獨不忘
閩閭城中可終老安得西歸買滄浪

次倪元鎮送子還山韻

烏蜀先生相見稀鍾陵初戴索書歸江南蕭艾作人立
卷裏盧龍看雪飛已瞻元亮有道氣重惜子真猶布衣

去去空山相憶夜朱絃三嘆為君揮

水仙

芳草有時歇無此金玉相一枝和月露持奉水仙王

南真館池上橘花

花攢嘉樹雪鬅鬢遮斷蓬山小朶青
答報風光先醉去
穠香吹過却全醒

仲穆蕙花

空谷幽芳絕代姝紛披翠袖不勝扶
金屏芍藥三千朶

合讓光風轉蕙圖

雲槎軒壁

米家畫船虹貫月得似雲槎一小軒
閱世浮雲坐枯木此生何必窮河源

餞陳子原赴官台州

寄語天台馬子微金堂玉室未成歸
此行却羨陳夫子瀑布岩頭攬布衣

玄覽堂絕句

殷勤老去惜年華
午夜張燈繡幕遮
吹遍玉笙天上曲
空將列炬照林鴉

題調馬圖

新進驊騮步未勻
風塵馳驟乍離羣
奚官老臂千鈞力
不許飛騰去繭雲

賦鶴巢贈趙伯容次虞伯生韻

仙人有騏驎結巢華頂松上覆三素雲
下立千仞峯笙吟微度曲雪步稍留蹤
羽衣何頗然云是趙伯容左帶

明月璫右佩蒼精龍誰令三青鳥銜花以相從鑿戶繩
樞澁藏書玉檢重悵望浮丘伯人間倘再逢

題李遵道蟠松

造物何知曲全意世人尚怪支離形中茅嶺上蒼髯叟
卧護東南半壁青

題顧定之竹石

龍孫乍脫襦兒錦石面多皺彈子窩畫妙通神欲飛去
虎頭癡絕奈渠何

鵲華秋色圖

有序

吳興公自序云公謹父齊人也余通守齊州罷
官來歸為公謹說齊之山川獨華不注最知名
見於左氏而其狀又峻峭特立有足奇者其西
則鵲山也乃為作鵲華秋色圖張雨賦詩於左
弁陽老人公謹父周之孫子猶懷土南來寄食弁山陽
夢作齊東野人語濟南別駕平原君為貌家山入囊楮
鵲華秋色翠可餐耕稼陶漁在其下吳儂白頭不歸去

不如掩卷聽春雨

漢銅馬式

曾同避世東方朔此馬見之金馬門一自露盤辭漢去
銅駝荆棘幾消魂

餞魯子升之維揚憲幕

頭銜新署似冰清蘭省超遷分外榮代北衣冠傳舊族
淮南草木借先聲大鵬徙海扶搖上驄馬追風次第行
久疾辱君深料理老懷此日若為情

惠山泉

水品古來差第一天下不易第二泉石池漫流語最勝
江深湍激非自然定知有錫藏山腹泉重而甘滑如玉
調符千里辨淄澠罷貢百年離寵辱虛名累物果可逃
我來為泉作解嘲連喚點茶三昧手酬我松風吹兔豪

寄題清隱齋

住向壺中多歲月市塵蹤跡漫相猜閒眠政使書裙去
徑造唯應看竹來數葉水蕉籠筆格一牀山罽裹琴材

白鷗信是無機事每共臨池日幾回

次鄭明德韻

衣桁長容蛛網懸石牀渾讓女蘿牽道術何煩孔即祀
屋廬政用郗超錢泉奔磳底歸樵路雨壓厨頭蒸术烟
誰見西林拆書夜一枝風竹鵲鳩眠

書懷二十韻奉呈虞集賢

昭代千齡運斯文一柱功初當延祐日晚識廣平公朝
士因推轂先生猥擊蒙睽乖逾廿載寤寐接孤風太史

山川彥仙儒館閣崇置身清切上用志宵冥中句法黃
初過才名冀北空朔南馳使節江漢借歸蓬酒問餘杭
姥泉尋六一翁境非秋水觀寺即紫微宮侍坐要王遠
移居近葛洪於焉承咳唾足以振罷癯卓爾身為貴胡
然老見攻戰肥終道勝德重豈途窮玉趾間紆步麻衣
病鞠躬茶烟窻冉惹墨沼樹玲瓏飢甚無瑤草招來有
桂叢輸心何落落把袂輒息息易進乘軒鶴難追戲海
鴻明朝去吳會長嘯為誰雄

題看雲圖

亭子荒涼竹樹根
隔溪遙見白雲屯
坐來捫蝨談何事
著我青山酒一尊

題趙松雪畫竹枝扇面

阮咸便面如團月
誰掃竹枝團月中
識得吳興有聲畫
為君箕踞寫松風

李仲賓寫竹

新鱗黯淡何人墨
四十年前老薊丘
向使戴家多種竹

雪中那肯便回舟

倪元鎮小幅林石

誰可米顛相伯仲
風流還只數倪迂
應將爾雅蟲魚筆
寫此喬林礪石圖

王戴松寫水仙

刺藤政索山陰畫
月佩風裳滿眼飄
記得年年春雪後
金鴉甯斲水精苗

織成仙山圖便面

鮫室水絲翠織成胎禽珠樹儼長生采雲小隊霓旌節
曾伴紅鸞扇影行

金人出獵圖

小隊鳴笳曉出園地椒狼藉獸應肥上皇久厭紅羊炙
故遣蕭郎擊豕歸

芍藥白兔圖

妥帖紅雲朶迷離玉兔兒揚州行樂地惆悵鬢成絲
桂花下約玉晉卿飲

翡翠黃金屑檀欒秋後開一杯持問月更待賈淳來

述古十二首

不愛昆岡玉不愛江漢珠愛已一蒼壁有之利有餘吾
生為我有其利當何如論爵不足貴論富不能踰達性
命之情順生以自娛

荆人有遺弓索之將奚為且荆人遺之乃荆人得之孔
子聞之曰去其荆可耳老聃聞則曰去其人可矣天下
有至公孔聃得其理天地且弗有莫知其所始

堯昔讓許由朝之於沛澤若曰日月出燭火乃不息天
下既已治歸矣奚復益遂之箕山陽飲水耕而食怡然
終其身無有天下色

魯君聘顏闔踰垣避使者我非惡富貴君乎獨不捨全
生以為上迫生以為下當知得道人治國其土苴

墨子歎染絲所歎一何長染於蒼則蒼染於黃則黃奚
獨染絲然染國在所當有染如伊尹禹湯稱聖王殷紂
染惡來既染國亦亡染士如孔聃死久道彌光

虞人百里奚所鬻五羊皮有得其說者乃是公孫枝獻之秦穆公四境不足治賢者倘不過後世誰當知

昔者齊桓公往見小臣稷一日凡三至欲見且弗得驚爵固輕主驚霸亦輕士夫子縱驚爵驚霸吾敢爾所以終見之不為從者止誰云內行缺論志亦可矣

桓公遇甯戚飯牛中夜起賜之以衣冠一說境內理再說為天下桓公以師事衛與齊不遠安用疑客子不患有小醜所患亡大美且人固難全用長當若此

嘗聞柱叔厲早事莒教公教公不為禮入海滅其蹤及
聞公有難辭友往死之昔我之去彼自己為不知今而
不往死是真知我非節行在所勵君心徒自欺

業煩則無功禮煩則不莊令苛則不聽禁多則不行國
人逐狡兔因之殺子陽嚴刑無所赦適足召亂亡

齊有善相狗假買取鼠者數年不取鼠畜之不如捨相
曰實良狗志在虜虜鹿欲觀取鼠能請桎其後足桎足
乃取鼠淹溺驥焚氣安得忘言徒喻此鴻鵠志

燕雀爭善處處在大屋下
姁姁甚相樂子母得相哺
一朝竈突決火炎屋棟燬
燕雀色不變不知禍及子
人臣私聚斂速國壞網紀
孰謂斯人智不如燕雀耳

觀雲軒為盧伯融賦

泰山膚寸雲翻手為白衣
朝旦雲出戶景落雲守扉
我家東海上開軒人跡稀
觀物有成壞觀雲無是非
一塵迷衆目野馬隙中飛
所以子壺子示我衡氣機

游龍井方圓菴閱宋五賢二開士像

獨尋招提游果得世外歡昔賢所栖集畫象藏屋端山
僧啟鎖魚不待啜茗乾修廣各異製精采俱生完堂堂
蘇長公英氣邈難干筇杖紫道服天風吹袖寬清獻薄
須眉示我鐵肺肝尚餘所施物片石櫛而寒侍郎胡金
華高拈侍中冠眉間可容掌手板出中單賴濱與淮海
秋色亞層巒參寥獨緇衣頽髭茁茅管最後辨才師文
茵高座安空山一室內舉目皆龍鸞再拜傾挈壺喜極
更悲酸去之三百載歸路何漫漫斯人為列星下視虫

沙繁寧不念學子道術救凋殘抵舍亟摹貌微哉難控
搏夢中倘未遇展詩時一觀

游西山靈鷲諸刹

碎此空青寶納此黃金龕水流澹無與石色終懷慙顯
途讓羣趨幽跡恣窮探紅泉浸短竹翠雨淋長柵靈運
久成佛妙語將同參猿公亦自慰復聆勝士譚前旌罔
兩避後乘拙术駢周旋蟻封中丘垤皆精藍菜肚乃知
足為目庸非貪維南粵一壑歸路瞻浮嵐

閒止齋詩為張子英賦

張侯溫玉質被服謝紉綺居然冠蓋族渺若山林士昔
人亦有賦閒居因拙仕自無止水鑑何以止衆止攬芳
玩華藥探玄味圖史子孫遺以安考祥視所履若將與
日競付之當塗子

明靜院夕佳樓

西山朝氣爽南山夕氣佳朝爽人共忻夕佳吾所懷山
僧閑世久結廬深避乖蕙樓方對峙茵閣亦雙排維南

金
有崇阜不受烟嵐霾我亦遲莫人心跡倦鳥偕茲焉託
高躅庶與靜者諧

無波古井水

古井何泓然不食自甘冷去來絕攀援挽斷轆轤綆唯
有中宵月圓中時照影

丙戌元日齋居

寒碁去年水冰華殊未銷亦知餘牘在凍雲晝封條春
王謹歲始由來重三朝野褐無朝次端居唯寂寥鑪焚

芳氣達榻暖术烟飄顏齡諒難制修短寄一瓢幽人保
貞吉無庸干山樵

趙千里聚扇上寫山次韻題

翠水丹山氣磅礴幾疊香痕經手握何年破鏡飛上天
吳淞水剪并刀薄江南寶繪多遺餘王孫不歸恨薜蘿
薜蘿無消歇秋風起班姬為我歌烏烏

鄭明德倡曰宋諸王孫妙盤礴萬里江山歸一
握卷藏袖中紆在手清風徐來殺衣薄文采於

今零落餘凋闌玉砌淒烟蕪至寶不隨黃土化
門上空題頭白烏

倪元鎮和曰誰見鮮衣乍盤礴卷懷雲烟歸掌
握春雨冥冥江水波竹間日暮衣裳薄零落王
孫翰墨餘越王臺殿久荒蕪要知人好畫亦好
愛此當年屋上烏

陳子貞和曰亭衣春暖初盤礴點綴溪山不盈
握白雲隔浦見桃花坐使涼風起林薄故物凋

零百歲餘王孫有恨迷平蕪
衡門今日看真蹟
始與人辨雌雄鳥

次韻虞道園懷張秋泉真人
短歌贈其從子戴士
安研山蓋其傳寶云

曾見研山如見畫
蒼龍一泓在其下
真人氣岸雄且堅
此石精英可方駕
掉三寸舌帝者師
入不言兮出不辭
手把瓊芳迎太乙
江南草木回春姿
更借龍泓涓滴水
天藻亭中筆新泚
題詩何必見安道
從子風流政如此

半雲歌

四明之客半雲叟要我為作半雲歌
丹山赤水一百八十里山川出雲何
其多其下瀕洞根溟波其上泛濫支
銀河唯當半雲間仙人道人常婆娑
雲之莫兮海為岸日蒼涼兮雲之旦
芝宮與貝闕乃在雲之半我來為指
雲間路中分茅屋東西住待得還丹
草創成定將雞犬雲間去

登善精舍葺治苟完賦七絕句

故山破屋誰來補辛苦經營拾燕泥
幾樹桃花相送老
不消更著子規啼

澗中采石重鋪逕坡上移花小築墩
深結雲嵐為保障
賸培松竹當兒孫

梓柳都移五十栽稚松千箇綠培
認旁人莫笑千年計
萬一他時化鶴來

就暄前坐開陽室北牖來乘水洞涼
憂世何關吾輩事
有時蒿目據胡牀

玉鈎橋水如凝碧
繞過牀頭瀉瀑雷
恰是東風太薄劣
逆流花片出牆來

故向山椒冠小亭
諸峯收拾入簷楹
行人指點藤蘿外
不道薔薇澗底行

一生坎壈不稱意
政是此春風雨天
稍使桑榆見殘日
也勝中酒過年年

山居十詠用張率性韻

先世守清閑而我益孤寒
依彼桑及梓樹彼芷與蘭
太

上詎忘情護養老黃冠高明鬼闕室敞廬方苟完

右登善庵

朝氣雜非烟初陽發晨霞指顧烟霞中締構即吾家
衒口淨鉏草岡頭增築沙未睹隔几石先見隔垣花

右烟霞衒

折流十丈強赴此作甘冷如曳白練裙美人延修頸
日曝老蛟涎雲排斷虹影不比玉鉤斜此地極深靜

右玉鉤橋

靈泉非外得清澈見泓底木根深糾蟠恒恐龍蛇起為
君挈茶具煎茶要煎水平生張又新續記自此始

右小龍泓

芝生玄嶺隅置之讀書堂雖匪照乘珠幽谷有耿光我
聞隆漢日丹碧生齋房小草不異昔於以表時康

右紫芝館

隨山皆北面此室就陽明翩翩披竹素種種羅芝英內
償首丘願外了遺世情奉君茅簷日亦足寓吾誠

右開陽室

几榻枕泉上竹樹破崖根清風無時來白晝為掩門崖
根立香爐泉上出窪尊考槃獲長年何有嗜欲昏

右澗阿亭

鑿池象弦月一水來不緩但令驗盈縮奚必分半滿差
差簟竹涼漾漾芹藻暖臨池學書者詎識崇玄館

右半月池

何年洞庭波伐此青山骨其安絕清溫其氣殊宰兀下

將壓神鼇上欲攀棲鶴盍觀道之凝雲氣從此發

右凝雲石

池上塚纍纍而有此仙客自無一丘樊何以容六翮冷
然合喙鳴月露浩以白矯首太清家歸路才咫尺

右來鶴亭

吳大宗師索賦河圖仙壇下圓池

為愛靈泉來弗竭一池新鑿向丹丘靜同太極渾淪體
動合滄溟浩瀚流大珠往往爭明月清鏡時時點白漚

聞道仙壇碑絕妙蛟龍文采照千秋

研山圖

淮陰龔聖予
題十詩于上

南宮米老書無敵同盟亦有薛河東
研山自昔懷清賞
石友令人拜下風
絕頂方壇承露潔
游神空洞與天通
平生古學龜城叟
一一題詩取次工

屯江元戎村樂亭

行營好在春江上
村樂亭前芳草柔
門有在官蛙鼓吹
時無久戍蝨兜鍪
水流翻動魚龍窟
沙汰洗空狐兔丘

借我清談白羽扇還君暖老黑貂裘

寄同別峯

賀監湖頭實非夢春林林下迹還稀陰雲鰻井層層上
落日龜山故故飛布襪青鞵身向老赤髭白足意多違
牟尼政使無人識護取傳家大布衣

夏商隱還京師

試華判
憲墨

扈蹕行營三十載侯門不肯曳長裾閒從角里先生飲
與說圯橋老父書花外飛凡紅叱撥月中采藥白蟾蜍

殘骸倘有刀圭分會向南山覓敝廬

段宰吉甫金壇回舟有詩次韻

不肯折腰彭澤令清風留與後千年雪殘鷓鴣人回首
路近蓬萊風引船故篋書隨朝服解老梅枝映燭花然
天下奇才段公子未應歸問酉陽田

趙伯容入都

翩翩濁世佳公子玉立身長要羽衣野鶴樊籠那肯住
鯉魚尺素莫教稀八分字許千金直萬斛舟隨五兩飛

金匱要略
卷五
對御談玄能事了明年春早約來歸

雪景三香圖

紹興侍詔修武
郎梅和寫生

雪羽相呼雪意濃國香狼藉暝烟叢倩誰與剪吳淞水
愛爾能吟柳絮風翠袖佳人玉條脫平頭奴子錦薰籠
劍南畫手看前輩著粉施朱或未工

僧擇中送龍翔遺書泐東回求詩

大夫公有遺書札送得元沙白紙來飛錫應真攜衆接
燒香侍者拆封開繞渠薜荔牀三匝進我胡麻飯一杯

已是人間觀小劫麒麟高塚盡莓苔

馴鷺

孑然馴鷺雪霜明下瀨求魚照影行碧玉燈檠雙足瘦
白麻衣袂一身輕海鷗見事應何晚凡鳥題門也不情
輸我鴛鴦行舊儔侶舉頭寥廓總雲程

鼇峰宜晚亭

鼇峰亭子偏宜晚約下風煙與細看獨鶴歸時煩寄語
夕陽春外一憑闌昔游謝朓空陳迹回首敬亭生暮寒

萬一桑榆容倦翮西飛會訪毛公壇

早春偕張率性贊府游大滌山

春日春陰人日雨溪頭第一番春船山中惟知許史貴
我輩還同李郭仙長夜詎能勝樂酒獨醒不復廢清眠
才情合讓張從事白雪貞松取次妍

晨興

聊與梅花說歲窮真成古木共衰翁百年勲業何煩爾
一世雲山不負公寒夢漸消慙影上春容已在雨聲中

晨興陡覺詩神旺未放韶華角長雄

道館雅集聽琴次楊彥常韻

幽蒿細竹滿牆間雨後危牆似斷山一室了忘塵世隘
諸君能賞病夫閒池巡野鶴魚苗綠土蝕秋蟲菜甲斑
我不鼓琴偏識趣絕憐失勢重躋攀

讀戴帥初剡源集

剡源詩卷落吾手便似移家太白峰學道昔慚山世遠
知人今愧郭林宗空山樂書有遺譜白日天馬無留蹤

皆集
中譜

太息斯人不可作
厭將兩耳聞寒蟲

老學齋書懷寄京師故人

手種羣松數尺圍
草深南澗客來稀
一經斷送垂垂老
萬事安排念念非
晨待焦蘇才萼食
涼驚絡緯尚絺衣
蓬萊坊裏清宵月
也到山家白板扉

中庭古栢

庭中異栢前朝物
銅柯石榦兀青蒼
雲壑終憐老蛟卧
珠樹獨留威鳳翔
月上圓陰移覆砌
雨餘古香飄近牀

支離踈老深根在閤盡世人還久長

李遵道寫湖石

好石昔聞牛相國寫竹今唯李使君能消龍尾一螺墨
與染蛾眉半朵雲瑶草種來秋著露昆刀藏去玉成文
堂上朝來有佳氣淮南獻壽獨殷勤

張彥輔雪山圖

清才絕似王摩詰愛向高堂寫雪山華蓋洞中如屋裏
赤闌橋外是人間瓊樓祇許飛仙住珠樹應留織女攀

莫信寒泉傷玉趾最宜清暑聽潺湲

萬竹亭

高懷思得去人羣馬馱沙頭竹似雲亭子當江偏窈窕
主人遮道欲殷勤日中見斗青霄立月下吹簫碧洞聞
渭川自足封侯擬未數零陵萬石君

絕句

白足過橋三峽雪蒼頭吹笛滿林風狂花也有凌霄意
飛上松頭爛漫紅

謝僧送柑

肚能堅束三條篾手亦親栽兩顆梨
珍重黃柑三百顆
好山多在洞庭西

殘梅

皎皎當窻萼綠華滿懷幽恨付山家
春風春雨息息去
一點殘香啄暮鴉

野桃花

野桃無語最含愁若箇林間得放牛
比似落英歸糞草

不如流水出香溝

白雲半間圖

陶隱居別
號外兵

白雲住處不曾扃
割取西偏著外兵
伸脚三條椽下卧
任君裘蓋洛陽城

歸自天柱山招樸菴僧

仙人住近餘杭姥
得酒移罇上野航
踏雪能來傾一餞
風流不減在餘杭

三香圖

凌波仙子塵生襪空谷佳人玉鍊容不奈天寒風露早
日高猶傍錦熏籠

筍箕吟書黃山人石壁

石為箕不可以蔽揚箕盛水瓢飲足濫觴一漱一咽洗
髓腸載援斗柄挹天漿半夜箕犯月大風捲地我欲狂
起騎箕尾跨石梁長嘯應谷驚下方張皇醉降黃姑房
哆然大笑箕口張水流月明天蒼蒼

冬日五言

雨雪衡門晏陰景薄山阿飛鳥各謀食愧此養微疴餘
生轉晦昧芳歲亦蹉跎勿云幽疾久去疾將如何

雪作

夕寂微生聽寒禎稍使猜明珠交撒帳銀甲整銜枚厲
鬼鋒令挫東皇駕即回眼中紛物色白戰若為裁

澗阿對雨

山雲油然作山雨來不緩既霑靈石塢遂洒寒鴉館落
木速如許衆草行復爛有酒不斟酌無物堪把玩與聞

季長笛寧從中散鍛代謝夫如何徒為白首嘆


步歸靈澗幽泥染居士屨不知嵐雨深稍怯布衣薄拂
牀次羣帙掃逕堆脫籜清坐亦偶然吾非慕仙爵

九日風雨清齋

中林授衣節寒氣早已集牖戶薄裘褐凡百闕治茸窮
居味時序頗訝光景急叢篁助幽翳濃瀨發空寂水禽
穿屋過岩樹排簷入陶幘既塵清墨突亦面立遐思把
菊詠端處掬溜室空言非藥餌殆不廢九日

歲暮

忽忽歲云暮徒興白首嗟
山留待伴雪春禁隔年花把
卷因遮眼分飭且膠牙
自緣身懶惰莫遣送窮車



草堂雅集卷五